

四庫全書

史部

欽定四庫全書

史部

歷代名臣奏議卷六十一

詳校官檢討_臣朱依炁

編修_臣裴勳覆勘

總校官編修_臣王燕緒

校對官庶吉士_臣毛鳳儀

謄錄監生_臣徐秉文

欽定四庫全書

歷代名臣奏議卷六十一

明 楊士奇等 撰

治道

宋理宗時詔求言處州教授陳塤上封事曰上有憂危之心下有安泰之象世道之所由隆上有安泰之心下有憂危之象世道之所由汙故為天下而憂則樂隨之以天下為樂則憂隨之有天下者在乎善審憂樂之機

而已今日之敝莫大於人心之不合紀綱之不振風俗之不淳國敝人偷而不可救願陛下養之以正勵之以實蒞之以明斷之以武而損直聲始著於天下

戶部郎官張忠恕上封事陳八事一曰天人之應捷於影響自冬徂春雷雪非時西雪東淮狂悖洊興客星為妖太白見晝正統所繫不宜諉之分野二曰人道莫先乎孝送死尤為大事孝宗朝衣朝冠皆以大布迨寧考之適孫承重光宗雖有疾未嘗不服喪宮中也洎光宗

上賓權燄方張莫有言者去秋禮寺受成胥吏未嘗以義折衷慶元間再期而祥百僚始純服吉今若甫經練祭雖朝臣一帶之微不復有凶吉之別則是三年之喪降而爲期害理滋甚況人主執喪于內而羣工之服無異常日是有父子而無君臣也三曰太母方卻垂簾之請而慶壽前期陛下吉服稱觴播爲詩什此世俗之見非所以表儀於天下也四曰陛下斬然在疚大婚之期固未暇問然非豫講夙定恐俚說乘間而入臣所望於

今日者亦曰嚴取舍而正法度廣詢謀而協公議爾五
曰陛下於濟王之恩自謂彌縫曲盡矣然不留京師徒
之外郡不擇牧守混之民居一夫奮呼闔城風靡尋雖
弭患莫副初心謂當此時亟下哀詔痛自引咎優崇恤
典選立嗣子則陛下所以身處者庶幾無憾而造訛騰
謗者靡所致力自始至今率誤於含糊而猶不此之思
臣所不解也六曰近世憚佞之徒凡直言正論率指為
好名歸過夫好名歸過其自為者非也若首萌逆億厭

惡之心則自今言者望風見疑此危國之鳩毒七日當
今名流雖已衰顯而搜羅未廣遺才尚多經明行修如
柴中行陳孔碩楊簡識高氣直如陳宓徐僑傳伯放僉
論所推史筆如李心傳何惜一官不俾與聞況邇來取
人以名節為矯激以忠謹為迂疏以介潔為不通以寬
厚為無用以趣辦為彊敏以拱默為靖共以迎合為適
時以操切為任事是以正士不遇小人見親八曰士習
日異民生益艱第宅之麗聲伎之美服用之侈餽遺之

珍向來宗戚閹官猶或聞見今搢紳士大夫殆過之公
家之財視爲已物薦舉獄訟軍役吏役僧道富民凡可
以得賄者無不爲也至其避譏媒進往往分獻厥餘欲
基本之不揺殆却行而求前也疏入朝紳傳誦

禮部侍郎真德秀上奏曰臣竊惟今日求治之要莫難
於得天心亦莫難於收人心然天人非二致也得人斯
得天矣在易大有上九自天祐之吉無不利孔子曰天
之所助者順也人之所助者信也當元祐初二聖臨朝

聽政四方稽首請命西羌夏人降附相尋而黃河北流
有復禹舊迹之勢天下曉然知上意與天合蘇軾推明
其故以爲此二聖躬信順以先天下之功也夫無一事
不當於天心乃可言順無一事不孚於人心乃可言信
今陛下躬親庶政內稟慈謨以時攷之甚似元祐而求
之於天則震雷雨雪繼見於冬春星文變異游形於邇
日求之於人則忠義之旅反側未安朝野之民咨歎未
息意者朝廷之舉措所以信服乎人心者有未至歟人

心之未信此天心之所以未順也夫是是非非之理本諸天道而著在人心不以古今而存亡不以智愚而增損上之所爲一與理合則不待教令而自孚上之所爲一與理悖則雖加刑僇而不服然則今日人心之未信者果安在耶成王之命君陳曰有廢有興出入自爾師虞庶言同則繹孔子荅哀公之問曰舉直錯諸枉則民服舉枉錯諸直則民不服蓋立政用人未有不參稽公議而能厭服天下者祖宗盛時凡有大政必采羣言太

平興國中秦邸之事作太子太師王溥等議于朝堂者七十有四人然後有詔裁決以大事之不可輕也迺者雪川之變眎昔略同而未聞有參聽于槐棘之下者此人情之所共惑也康定慶歷間簡求西帥必取當世第一流宰臣呂夷簡至忘讎薦進以重任之不可輕也往者淮蜀二閩之除皆出僉論所期之外今其效亦可觀矣而除目游放僉論之不同猶昔也天下之事非一家之私其在公朝何惜不與衆共以求至當之歸乎且廟

堂之上所以廢僉諧而任獨見者不過惡聞異論而已
抑不思事未行而有異論吾猶得以參酌可否而惟是
之從事既行而有異論則國體已傷而救無所及朝廷
施爲動闕理亂嘗試之誤豈容數耶臣願自今國有大
議陛下虛心於上使羣臣各得盡言於下大臣至公無
我而羣擇其中至於簡拔材能以當重任亦必以公論
為主此今日收人心之一事也賈誼有言慶賞以勸善
刑罰以懲惡先王執此之政堅如金石行此之令信於

四時據此之公無私如天地今之賞罰其未能允愜衆
志者毋乃有未適其平者乎夫難平者事也惟任理無
情而付輕重於物然後施置得所而人莫得而議焉今
有功同而賞異者問之則其厚者必某人之所主也其
薄者必孤寒而無援者也又有罪同而罰異者問之則
其輕者必某人所主也其重者必踈逖而寡與者也朝
廷之於天下當如天之於萬物栽培傾覆付之無心而
可使一毫私意介其間乎諸葛亮偏方之佐爾而其言

曰吾心如秤不能為人作輕重故當時之臣有為其廢
絀者不惟無怨而且思報焉況堂堂天朝誠能以至公
之心行至平之政則與奪所加誰敢不服惟陛下常存
此心而總綱於上大臣常守此道而持衡於下賞一人
必使凡為善者勸罰一人則使凡為惡者懲此今日收
人心之二事也夫官之失德以寵賂之章其在昔人以
為至戒當乾道淳熙間有位於朝者以饋遺及門為恥
受任于外者以苞苴入都為羞今薰染成風恬不之恠

陸贄有言鞭靴不已必及衣裘衣裘不已必及幣帛幣帛不已必及金璧由今觀之豈止是哉新巧相夸而亡窮誅求橫出而罔極於是軍民之膏血竭盡而無餘矣怨讟繁興日以滋甚然貴臣邇列非必有利之之心往往藉其名以事侵刻者大抵皆是利歸私室怨萃公朝抑何便而莫之止也今誠欲息天下之議惟在朝廷曉然示人以屏絕之意甚者反其物而舉其人則心迹暴白而假託以自私者不得肆矣正已示儀之方孰先於

此仍願斷自聖心誕降明詔以儆中外俾皆滌除貪
暴砥厲廉隅惠綏兵民銷弭怨疾此今日收人心之三
事也朝廷之規摹欲其廣大不欲其褊狹治世之氣象
欲其寬裕而不欲其迫蹙商民之胥動浮言若可忿疾
而盤庚方且登進在庭丁寧開曉藹然如家人父子之
親周公作無逸以戒成王亦曰小人怨汝詈汝則皇自
敬德又曰亂罰無罪殺無辜怨有同是叢于厥身夫以
怨詈殺人周公之所畏也獨奈何其輕犯哉曩者以訛

言之籍籍於是有譏呵之令譏呵則已過矣甚至於流
竄焉殺僇焉而人愈駭矣傳曰我聞忠善以損怨不聞
作威以防怨自譏呵之令行都城之民搖手相戒有道
路以目之風此何等氣象而見於聖明嗣服之初乎夫
峻刑而重罰本欲以一衆心而不知人情之疑懼則其
心之不一正自此始不惟是也朝廷布羣材於列位夫
固賴其言以相正也而選懦成風精銳銷喪朝有闕政
則拱嘿弗言而私嘆於家朝有過舉則進焉導諛而退

竊非議尊君親上人情所同本心昏迷何至於是亦由誘導未至而猜阻先形人思苟容誰敢自竭且自孝宗以來臨御未幾即下求言之詔訪問所逮下至芻蕘今詔旨之頒既徐徐數月之後而僅止官吏罔及士民方明目達聰之初遽示人以弗廣何以昌士氣何以達下情是宜播告雖修而人以虛文視之也今誠欲慰天下之望惟當開廣規摹昭示德意解煩苛之網闢寬裕之塗而又式循舊典載播綸音常布之微咸許論事庶幾

憂虞者得以自安忠直者得以自奮此今日收人心之
四事也古今天下最易失者莫如人心而最易感者亦
莫如人心轉移之機殆類反掌今中外惘疑遠近咨怨
非大有以慰安之臣恐攜離日甚一或騷動將有不可
收拾之憂此羣臣之所共知顧恐度所惡聞未有以實
告于上者爾然臣區區豈欲朝廷專尚姑息苟為噓濡
以悅之哉惟公惟平惟正惟大一循天下之理而不雜
以一己之私易之所謂信順者如是而已惟陛下與二

三大臣身體而力行之則天人之助將有不求而自應者元祐之治豈難致哉意切言狂伏俟威譴

兵部侍郎曹彥約上奏曰臣伏讀聖訓至再至三仰見陛下夤畏以奉天艱難以濟業不矜伐聰明不鄙薄愚賤博采旁求思有益於治道而後已臣待罪言語侍從之列職思其憂聖意之所未及猶當有以補報萬一矧惻怛求之可無一言以自効耶臣竊觀陛下嗣服之初未嘗有失德于天下而天下之共治者常有凜然不安

之憂天下之論治者常有歉然不足之歎不可謂之小故也豈新政所當行者有未盡耶亦事變之方來者有難測耶將異議者好為紛紛而不足卹耶亦將疑其說之不合而思求以勝之耶明良精一之地兢業萬幾主德必欲其宣恩澤必欲其流乃方與賢士大夫爭辨於是非之際疑似於從違之末則致治之効無時而可望矣都俞之堂何嫌於吁咈好謀之主何難乎銷印施行容有未盡事變容有難測異議者正所當卹而其說之

不合者不足勝也臣不暇廣譬曲引以明前事之失亦不敢偷容取悅以媚世俗之好竊以爲重裘可以禦寒自脩可以止謗若國是之所以未定與人情之所以未孚陛下諸臣皆足以應詔言之矣不復條列以紊天聽請即其易行者而徑言之庶幾其有補也陛下謹定省以事長樂開王社以篤天倫孝友之行宜足以取信於天下矣然而兄弟至親猶誤於狂妄小人之手道路異說猶襲於尺布不縫之謠事關國體人皆以爲難處矣

臣猶以為易也守法者人臣之職也施恩者人主之柄也漢淮南厲王欲危社稷大臣張蒼馮敬等請論如法文帝既赦其罪廢而勿王不幸而死即封其三子於故地以示私恩此往事之明驗本朝太宗皇帝之所已行也今若徇文帝緣情之義法太宗繼絕之意明示好惡無隙可指雖不止謗而謗乃息矣陛下招山東以復境土撫忠義以幸遺民混一之機宜閭端於此矣然而跋扈之將肆兇殘於制閭授鉞之人持依違於兩端去留

不常包藏未發事關國勢人以為難處矣臣猶以為易也戊虎牢之城鄭不得與晉爭杜太行之險楚不足以支漢用兵之道可以形格而勢禁不可以直致也江內者兩淮之腹心正軍者忠義之主宰有三萬之正軍然後可以制一萬之降卒有十萬之正軍然後可以制三萬之忠義今盱眙孤單江面闊遠三衙渙散見謂脆懦若能徙江外之闕額立江內之重屯人衆而聚則有才可選軍歸其營則無券可摩可以省廩稍可以減般運

使超石拔距之勇出其中而牛酒日至之聲聞于外然後經理淮壩振立威柄則犯上者斲為孝悌而狂狡者莫不率服矣陛下位置虎臣布列閫外峻陟驟用不拘常制宜有以得其人矣然而每一選用物論洶洶幸而無事則舉朝相賀不幸而敗事則舉朝歸怨事關國論人以爲難處矣臣猶以爲易也寇準之在北門則白溝不警矣張浚之在江左則淮淝不震矣今大而帥守小而一州選用已定臣未敢輕議金陵虛席公論之所屬

目合公論則朝廷奠枕拂公論則海內寒心筋力不逮者既不可以勝任位望未至者又不可以嘗試或已試而軍民不服或未試而公論不與豈惟臣獨憂之凡心乎國事者皆不免於過計矣臣以為人才不可以全求公論不可以力勝與其用輕虛淺迫之人不若用遲鈍木訥之士與其用掎克聚斂之才不若用寬裕溫柔之德其仁聲足以安百姓其器宇足以壓人望氣類相感則寮屬可以任事清介相勉則道義可以相規用人如

此則慙直者可以寢淮南之謀而儉約者可以罷子儀之樂矣陛下正旦視朝以求賢為急訪落親擢以靜退為首拔茅連茹以其彙征宜必以序而進矣然而詔旨所攷或指為文具選召所及或慮其不廣事關國幹人以為難處矣臣猶以為易也求賢者人主之心也用賢者人主之實也仁宗之用執政或給札於天章而使之盡言真宗之待兩制或賜對於夜分而與之議事故中外無不盡之情而田里無不安之俗今已至者列於朝

而未能行其言未至者遲於外而未能必其進有言而
未用則或者疑其沮於訐當言而未發則或者疑其局
於懦日月逾邁功效蔑然循習如此其視前日未求賢
之時何異今若考其言而信其所學用其長而棄其所
短則能言者無面從有懷者無腹非矣陛下求言之心
已形於御筆而播告之旨復發於手詔勤勤懇懇惟恐
不逮宜有以獲其利矣然而外議致疑莫能解釋以爲
明言文武似或止於衣冠而泛言小大恐不及於韋布

事關國脉人以為難處矣臣猶以為易也赦令之已行者猶必曰該說恐有未盡詔旨之已誤者猶必曰前降更不施行況已謂小大之臣則凡率土之濱者皆得以盡言矣引而伸之特在於一命令之間耳孝宗皇帝即位於六月之丙子而求言降詔已見於是月之甲申至八月壬午而進士上書者已補官矣九月癸丑而布衣獻言者已召赴都堂矣今若明降指揮發揚詔旨之意精選近臣考定可采之策舉而行之不間於樸直旌而

賞之首及於踈賤則在上者罔有逸言而在下者民用
丕變矣凡此數者舉天下皆疑其難而臣獨以易言之
臣非輕此數者而忽之也懼陛下疑言者之過而以為
不可行也懼言者測陛下之意而以為必不行也果其
不戾於聖賢不拂於典故可以寬聖慮可以繫人心若
何其不予簡易求之而使上下之情扞格而至於此也
然臣猶有獻焉立天下之事者貴乎斷處天下之事者
貴乎謙慮天下之事者貴乎詳行天下之事者貴乎速

肇十有二州舜之功也汝平水土乃歸之於禹薄伐獫狁吉甫之功也侯誰在矣乃歸之張仲謂天下可以一人治也不可以一人智力專也丘山積卑而爲高江河合水而爲大君不自有而歸之於其臣臣不自有而歸之於同列所謂謀及乃心者必謀及於卿士謀及卿士者必謀及於庶人然後人心悅服怨讟不生今天下之事雖出於獨斷而衆多之論豈無偶合程度者若因某人之說而建某利用某人之策而除某害造命於上者

不失於斷而推功於下者益示其謙此則舜禹之用心也故曰立天下之事者貴乎斷而處天下之事者貴乎謙武王克商未及下車而封黃帝之後於薊孔子為政甫及七日而肆少正卯於市謂盛德不可不速祀而姦宄不可不速去也臨淵而羨魚者不若結網之為便冠冑而枕轡者不若彎弓之為捷賞罰之所當行命令之所當出聞一善則若決江河去一惡則迅如震電使責望於上者無所憤怨而玩狎於下者不至苟免此則武

王孔子之用心也故曰處天下之事者貴乎詳而行天下之事者貴乎速今天下之大害者莫急於賊吏羣臣既已言之而陛下既已聞之矣竊意陛下將以行其言也而出令未暇也天下之大害者又莫急於苞苴羣臣亦已言之而陛下亦已聞之矣竊意陛下亦將以行其言也而出令未暇也議者不深察朝廷之意即謂厭薄其說而不用臣知其不然也陛下無意於求賢則不發求賢之詔矣無意於求言則不發求言之詔矣賊吏之

不可使治民苞苴之不可以立國夫人而能言之其在
聖明豈不知此何忍迂緩隱忍以至今日哉行臺諫之
所已言用轉對之所通論求賊吏之昭灼者而深治之
雖有功勿貸察苞苴之肆行者而遠斥之雖親賢勿釋
立此之斷處此之謙慮此之詳行此之決則臣猶以為
易也觸類而長舉天下無不可為之事矣然則天下之
事終於易而已耶禹曰后克艱厥后臣克艱厥臣孔子
曰為君難為臣不易聖人之言有異於臣之說者何也

蓋難於保治者君臣之心也而易於行事者君臣之政也
也有心於慮治則於理為難有政以為治則於事為易
上天有靡常之命祖宗立不拔之基以朽索而馭馬以
弱水而載舟若何而謂之易從諫則能如流改過則能
不吝賞善罰惡惟恐其不及舉直錯枉惟恐其不速若
何而謂之難臣之所謂易者特在於舍己以從人耳慮
治之所以難羣臣既已言之為治之所以易臣遂得以
進其說雖二事也其實一理也古者天子即位三卿進

策始之以除患則為福次之以先患慮患謂之豫終之以禍與福鄰莫知其門豫哉豫哉萬民望之以為禍者福之所倚福者禍之所伏言福而不言禍非所以愛其君而憂其國也陛下勿謂天災之未見而以為安也勿謂外難之未作而以為治也天災未見楚莊王以為憂外難未作晉范燮以為慮董仲舒所謂出災異以譴告出恠異以驚懼者推廣此意也賈誼所謂即不幸有方二三千里之旱卒然邊境有急者端本此說也臣壯時

粗有志時事今年六十有九多病少安去死無幾心志
既已不强議論又復淺陋自量筋力無益斯世感陛下
求言之意而羣臣又已建責難之義敢復求其所以易
者以獻望陛下行之而已非敢反常說而背古道也惟
陛下與大臣圖之臣不勝惓惓

彥約又奏曰臣聞天生民而立之君使司牧之非以厲
民將以全其生也絲麻穀粟皆所以養其生刑威慶賞
皆所以保其生甲冑干櫓皆所以護其生賦斂力役皆

所以久其生其有功於天下也如此然後居無倫之貴
享無敵之富玉食以為奉而黃屋以為居誰敢議者天
有愛民之心而不與民接民有願安之心而不能自安
以天下而付之於君以一人而奄有天下所以利於民
者必平治而害於民者必削弱意可見也本朝光有天
下復出唐虞三代之表攷諸名賢之論知其國祚長久
出於市不易肆其端甚微而其效甚顯萬世帝王之業
固已權輿於此矣累聖相承以民為本賦斂欲其必薄

刑罰欲其必輕力足以制敵而每欲議和兵足以討賊而每欲招安愛民之心與天通矣比年邊戍未撤糧運不寧事有牽制非朝廷之所欲也一家之大者多至百夫一夫之費者何止十緡其困如此而州縣猶以爲貨有濡沫不至而重疊差之者有富豪得免而移於下戶者水旱間作歲事不登事出不測亦朝廷之所憂也窘於浸潤者或不能入土殞於焦枯者或廢於鉅艾其災如此而州縣猶肆其虐有循行其地而憫若無見者有

量減一二以應故事者以至多量斛面名曰出剩碎納尺寸不許合鈔產去稅存勒令代納已經預借更作點名甚者嗾使頑民誣訴上戶執以隱微便加籍沒入其干連便作正犯千金之家萬畝之產視若已物曾無忌憚法令明備既不舉行朝論禁戒若無聞知蠹國害民一至於此習俗不美良可歎也亦又有可言者混區宇者莫大於兼愛傷和氣者莫甚於嗜殺假息微虞屢擾邊垂中原遺黎襁負歸化祖宗德澤深入人心者牢不

可遏一統之效可以循致矣敵以侵掠子女為軍前之
賞我則反其耄倪以示吾仁敵以焚蕩室廬為軍前之
威我則安堵黎元以示其整取級於當陣而不取於逐
北因糧於儲積而不因於民財使彼民之怨彼者怨之
而益急而其所以慕義者慕之而不置欲聲教之不暨
朔南不可得也如聞邊境之上浸失本意效尤於敵而
結怨於民逞怒於赤子而帖耳于敵國甚者忠義之徒
以打劫名軍主將通知未能遽革以此而欲弔民可謂

心迹判然矣百姓不奠枕則頌聲不作邊民不衽席則
簞壺不至臣願陛下嚴監司之選如仁宗之用張昱之
以按察為職則境內之民皆得其所重將帥之任如太
祖之用曹彬以不殺為賢則境外之民皆嚮其化如此
而邦基不鞏固社稷不靈長臣未之聞也敢以是為初
政之獻惟陛下留神

知瀘州魏了翁奏疏曰臣伏觀詔書凡内外文武小大
之臣有所見聞以封章來上者臣嘗讀易至天地定位

則乾與坤對山澤通氣則艮與兌對雷風相薄則震與巽對水火不相射則離與坎對此為先天八卦之序也然而語其用則地天而為泰澤山而為咸風雷而為益水火而為既濟蓋天道不下濟則地氣不上躋山體不內虛則澤氣不上通雷不倡則風不和也火不降則水不升也於是而為否為損為恒為未濟又即其大體而言則水雷山皆乾也火風澤皆坤也其要則乾坤坎離故先天之卦乾南坤北而其用則乾上而坤下也後天

之卦離南坎北而其用則離降而坎升也大率居上者必以下濟為用在下者必以上濟為功天地萬物之理凡莫不然況乾天也離日也皆為君之象坤地也坎月也皆為臣之象其理顧不曉然未有乾坤不交而能位天地坎離不交而能育萬物君臣不交而能濟斯世於泰和也臣嘗以是考諸今日之事而未能無惑焉行一事也上之人以為是而下或疑其私上之人其辭常泰而下之語常危上之人其念常紓而下之憂常迫然則

是居上者不能以孚於下而在下者不能以達于上此顯然為上下不交之證殆非細故也而莫有為陛下言之且上之人曰方今事勢庶幾其暫安矣內而畿輔之間善政嘉令以次舉行謗讟訛言今且消弭雖曰旱勢可畏而浙東一道雨暘時若雖曰物價未平而臨安一城錢會稍通外而疆場之事則齊疆魏服以次來歸敵國外患日就衰弱雖制閩遇害而兇徒自効已從鐫削雖狼心難保而委用得人必能調護此上之說然也而

下之人則曰內患外禍未有稠如今者也正月而潘丙之叛使我不得以全兄弟之愛二月而劉慶福之變使我不得以全君臣之義三月而紀邦瑞之亡使我不得以保歸附之民四月而荀夢玉之死使我不得以芘勤事之吏五月而客星入于尾六月而太白見乎晝皆為盜賊兵戈之象目前事變雖若粗定而禍根亂孽元未翦除號令賞刑元未暢達內則以貪吏治郡以暴政泣怨民而根本既撥外則以竅籍待悍將以弱勢操強

形而威柄倒持尚曰可以暫安誰實信之上之人曰百官有司庶幾其無曠矣內而有位之士兼收並蓄以盡其才年除歲遷以旌其勞雖多用親故然非親與故則無由知其人也雖不拘資望然純取資望則不必為吾用也外而任事之臣苟見其可任則試之以方面雖違衆背公不遑恤也察其可制則待之以不次雖濫刑黷貨不暇問也凡此規摹自更化以來二十年間未之有改雖間亦非才旋即消弭此上之說然也而下之人則

曰曠官敗事未有甚於今也廟堂之上大官倡聲一口
附和侍從之臣事不及知知不敢言臺諫之任擬非所
論論非所擬給舍之官號書辭頭實註紙尾經筵之選
職在切磋動懷顧畏百官有司問例決事計考望遷以
至將帥所以折衝禦侮也而國人非笑盜賊戮辱監司
所以揚清激濁也而賄賂相先貪暴相習郡守所以平
易近民也而與胥為市眚民如讎夫所謂大臣者所以
表儀百工也今顧狃於得失利害之私而使百工各不

能以盡其職尚得為無曠乎不特此也尊禮耆老所以
勸賢也下之人則曰不過隆以爵秩錫以鞶帶未嘗有
所訪問此郭公父老所謂善善而不能用于思所謂以
高爵厚祿鉤餌君子而無信用之實者也招延俊髦所
以重朝廷也下之人則曰不過趣以溫詔位之閒曹未
嘗有所信任此詩人所謂召彼故老訊之占夢孟軻所
謂終於此而已弗與共天位也弗與治天職也朝廷未
嘗以言語罪人雖事闕廊廟亦示優容不可謂不受言

也下之人則曰雖外亦示優容而疑其沽名惡其不靜
終於逐之而實則喜佞諛而樂辯給也朝廷未嘗輕聽
士大夫之去雖請至再三必示繫留不可謂不愛賢也
下之人則曰雖外亦繫留而疑其求遷惡其立異終於
壞之而實則私同已而用小才也朝廷之上士大夫日
以綱常名分不立為憂下之人則曰君命犯而主威奪
上無以表率而何以責在下朝廷之上士大夫日以禮
義廉恥不張為慮下之人則曰苞苴行而女謁盛上無

以風厲而何以遏其流雖然不特下之論為然也臣日
在陛下之左右而猶未能釋然于心者陛下未明而尚
衣進服始旦而司輦出房九門洞開七萃森列親臣近
戚魚貫而入起居既畢二府分班奏事宰臣留身密啓
然後贊者以新制引一班上殿閣門報無公事則大駕
已興陞楯皆出此人主御朝之事也為上之人未始不
曰人主夙興眎事無闕於禮亦云足矣而臣疑其不然
古人自朝至日中昃不遑暇食猶若不給乃今陛下臨

御幾一年中外非無事也臣每旦侍立但見陛下淵嘿臨朝頃刻而罷未嘗躬親聽斷屈已訪問豈為君真若是易易耶臣又退而觀於有位蟲飛而興會盈而退乘軒列哄以造厥司涉筆占位以書乃事文案山疊披閱未終而鳴鐘戒時聚食而返或造請權勢或奔走書謁此百官一日之事也為上之人未始不曰人臣分曹列局上下相承亦云可矣而臣謂不然古人謂無曠庶官天工人其代之其任至不輕也況今內訌外猘事幾錯

至豈是苟安之時臣每旦就列但見羣臣位卑勢踈者
猶能治常程文書制錢穀出入位高勢偁則謾不敢可
否事優游拱嘿交委其責豈為臣者亦若是易易耶臣
至愚極陋者也固已惕然憂之矧惟民至神也下至衆
也既神且衆而道謗市議每與上之論若不相似然則
是豈可藐如不聞乎陛下潛邸舊學講究新功閱天下
義理不為不多願試以臣言體八卦往來之用玩上下
交濟之理而思古昔以來有偏聽獨任忠言蔑聞百官

有司不脩其職發號出令不本於誠而挈持虛器長久而不墜者乎夫危機屢發而旋止此非美政也失今不治痞鬲日甚將為不可治之證治之何如一言蔽之曰以下情達之上耳然而陛下便朝講幄所對者不過三四宰執十餘講讀官縱下情未達無由上聞臣竊見祖宗時侍從近臣率是親擢且非時宣召與之從容講論雖文武朝士至使臣選人亦時得進見而禁林館職尤號親密司馬光推本此意嘗請日輪侍從一員晝直夜

宿以備不時宣召今陛下便殿講幄之暇深居禁中澹
然無營獨不可親擢天下之耆哲位之禁近日輪一員
時賜召對從容講論以盡下情乎祖宗時除臺諫亦由
親選每當言事雖於長官亦無關白自慶元權臣用事
臺諫遂與給舍同為廟堂私人臣以為自今陛下於輪
對羣臣之日察其議論之忠鯁器識之醇明東自宸衷
或遇臺諫有闕獨不可親加選任以盡下情乎祖宗時
事關大體必付之外廷集議自比日以來率是先期取

納議狀此制遂成文具臣以爲目今國有大事獨不可
盡除近弊一付外廷公議庭辯衆決以盡下情乎祖宗
時輪對羣臣及見辭官率是兩三班或食已再引自比
日以來創引一班罕所諮訪夫人臣將有所言積誠以
冀感格蓄聞以待疑問乃使之不得盡展所懷臣謂自
今獨不可數對羣臣反覆問辯以盡下情乎祖宗時置
登聞檢院以達四方之書朝政得失公私利害軍期幾
密皆得上達今此制雖存僅成虛設自今獨不可申嚴

厥司勿加沮遏以盡下情乎大抵此數者臣自省事以來猶及聞前輩大老歷歷能言高宗孝廟時數對羣臣及親擢臺諫等事又有語及兩朝集議輪對上書往往成誦每使人有恨不同時之嘆自孽韓柄國此制始壞今而復之是乃所以述高孝常行之規繼先朝未終之志收人心於渙散固邦本於蕩搖此陛下初政至近至切事也不然悠悠歲月上有失而下不諫下有怨而上不知如乾坤之否而天下無邦如水火之未濟而六

爰失位臣莫知所以為陛下計矣臣西蜀寒遠誤蒙陛下不以人廢言亟下求言之詔臣感泣思奮恨無以報稱今臣適以舊疾所撓凡再上祠官之請雖未蒙俞允恐疾狀轉劇無復瞻望清光之日故尚支持餘息為陛下懇懇言之

李鳴復上奏曰臣聞善用天下之勢者不可使失之輕善持天下之勢者不可使流於弱始焉輕而事變交激終焉弱而紀綱廢弛天下之治始有不滿人意者矣天

祐社稷柄臣云亡陛下以大有為之資當大有為之會
向也權去公室而今則挈之以歸於人主向也政出私
家而今則斂之以會於中書衆正之路闢而野無遺賢
羣枉之門窒而朝多吉士一時氣象翕然丕變由中及
外孰不謂一洗積年之薄習追還祖宗之盛治將無不
可者臣獨惜夫立志太銳而謹重之道不足求治太速
而培植之功不加謂富強可以談笑辦謂勲業可以徼
幸致政府方新而兩界之楮俱易此首事也自易楮之

令行而帑藏悉空矣庭議未集而六月之師已興此繼
事也自興師之命下而公私皆困矣財貨源流國之命
脉繫焉兵家勝負民之休戚關焉顧皆率意為之得不
謂之輕乎日遷月徙視官府如傳舍則用人失之輕求
得欲從養邊帥若驕子則御將失之輕號令數易而輕
在朝廷和戰迭用而輕在中國天下大器也而輕用之
若此此臣所以先為陛下惜也夫舉事而捷如吾意則
為之也易臨事而或有齟齬則應之也難以其難於應

也而一切解縱繩墨聽其勢之自之則天下事無復可
爲矣易楮初意本以佐用度也府庫竭名器濫而楮賤
物貴之弊自若興師初意本以大恢拓也士馬物故器
械散亡而內阻外訐之憂益甚一鼓作氣至再而遂衰
焉得不謂之弱乎士卒千紀但有羈縻則弱勢見於京
都主將債軍曲加覆護則弱政行乎邊鄙跋扈之習交
扇姑息之風遂成國勢九鼎也而削弱至此此臣所以
重爲陛下慮也由前而論固若可挽回唐虞三代之純

懿由後而觀幾不免流為唐季五代之陵遲考古以驗
今即理以揆事其何以為策乎昔者世至春秋周之勢
弱矣孔子曰如有用我者吾其為東周乎蓋謂東周不
足為而欲反之於西周之盛也觀其得用於魯行偽而
堅言偽而韡者首加誅戮正之以公法不聞待之以姑
息也曰家不藏甲邑無百雉之城於是叔孫墮郈季孫
墮費諭之以正理不聞誘之以厚賞也却萊兵戮齊優
而侵疆以復臨之以大義不聞示之以屈辱也蓋夫子

之所講明者由開闢以來不可易之常理爾是理也與
生俱生無智愚賢不肖人皆有之一日捨是雖天地不
能以有立而況人乎哉天下之勢由強而入於弱此理
之晦也天下之勢反弱而歸於強此理之明也夫子之
緒餘少見於用魯而夫子之蘊藉盡寓於春秋陛下誠
能取其用魯者以用天下推其寓之春秋者以律斯世
將見紀綱森嚴法度峻整君安其為尊臣安其為卑下
不敢凌上夷不敢亂華而國勢泰山其安矣當今要務

莫急於此臣無任俯伏祈望之至

鳴復又奏曰臣聞為天下者有道揆有法守道揆明於上法守行於天下不足治矣夫天下大器也事物之衆機務之煩非一人之智所能周知亦非一人之力所能獨任先王知其然故舉其事之要者以屬其股肱大臣凡天下大政令大更革必使之相可否而後行大謀議大賞罰必與之訂是非而後定應天下之大變排天下之大難進天下之大賢黜天下之大姦其他瑣瑣細

務皆不以累其心是之謂道揆舉其事之詳者以付之羣有司百執事曉錢穀者使治財賦識經略者使嚴武備明禮者掌禮明法者主法吏治之能否民生之休戚雖天下萬變日陳乎前皆有人焉執條據例以酬酢之是之謂法守委其要於大臣付其詳於羣有司百執事要則使之清心省事以思其職詳則使之畢智竭能以效其忠由堯舜三代以來未之或改也陛下厲精更始亦既踰年天下翹首以望太平而若內若外不滿人意

者十猶八九即其實而求之或者中書之務不清六曹之職不舉不容無議也且中書者政本之所自出也惟靜而後可別動惟簡而後可御繁若乃弊精神於蹇淺之餘疲智慮於瑣細之末至於軍國要務凡有繫於廟社之安危生靈之利害者事急則草草應酬事已則悠悠玩愒臣恐古之所謂論道經邦貳公弘化似不若此六曹者所以行君之令而軌範四方者也設一職當著其一職之效任一事當責其一事之實若乃觀美有餘

實用不足振起事功之意少粉飾治具之意多案牘滿
前乃受成於吏手職業俱廢殆無補於公家臣恐古之
所謂分職率屬倡九牧成兆民似不若此今天下事勢
可言矣往歲興師本以繫中原之望今一跌不振矣往
歲易楮本以平物貨之價今百貨愈貴矣東有徐邳之
寇則新疆悉所以名禍南有廣惠之盜則舊部亦敢於
生變欲和而兵未可撤欲靜而勢不容止邊庭驕蹇有
尾大不掉之勢番漢雜處有狙詐作敵之憂國論易搖

人心多惑如是焉而猶欲以蹈常襲故之規模當紛至
還來之事變能保其必濟乎臣願陛下宣諭大臣清中
書之務以遠者大者為憂重六曹之責以怠焉忽焉為
戒使上下相維紀綱不紊任道揆者各盡其道任法守
者各執其法天下庶乎其可為矣或曰六曹不任職久
矣應有勘當每含糊其辭應有指定多兩可其說故必
都司書擬而後其理明必廟堂予奪而後其事決臣曰
不然今之侍從尚往日之都司也安有任都司則辨事

任侍從則廢事哉今之都司即今之六曹郎官也安有在
省則賢明在部則愚暗哉同是人也易地則皆然顧上
之人所以責任者何如耳今大臣虛心無我邇者除目
播敷孰非廟堂之所進擬陛下之所旌擢委任責成當
如身之使臂臂之使指正不必有親疎輕重之別也任
以是職而不責之以其事奚益哉臣嘗讀柳宗元梓人
傳謂梓人之道類於相其為說曰梓人量棟宇之任視
木之能舉揮其杖曰斧彼執斧者趨而右顧而指曰鋸

彼執鋸者趨而左俄而斤者斲刀者削其不勝任者怒而退之亦莫敢愠畫宮於堵盈尺而曲盡其制計其毫釐而建大厦無進退焉既成書於上棟曰某年某月某日某建則其姓字也是足為佐天子相天下法矣臣每嘉歎以為雖古之伊傅周召其規模亦不外此今政府日困於多事而六曹幾至於具員用敢僭陳其說以瀆宸聽惟陛下與二三大臣實圖利之

鳴復又奏曰臣嘗讀書見周召相成王為左右召公不

說周公至作書以告之稱小子旦者二稱君奭者四無
非寓其懇拳之意達其懇切之情謂有殷多歷年所則
由伊尹至甘盤原其所以為殷之輔者凡七謂文王能
集大命則由號叔至南宮括推其所以為周之佐者凡
五曰若游大川暨汝奭其濟所以望召公者惟懼其不
至曰襄我二人汝有合哉所以勉召公者惟恐其不盡
不說者在奭開釋其疑而使之說者在旦烏乎此周之
所由盛歟且夫大厦之建非一木之能支大器之安豈

一力之能置使當軸處中者先有迭相疑忌之私則見之施設注措必有齟齬而不遂者周家忠厚之治著於分陝歌於二南傳而至于歷世三十歷年八百實自二相成之此可為萬世法也陛下總攬權綱舉數十年久廢之典並建二相竊窺廟謨雄斷意者見夫更化已久而治效未著欲使謀王體斷國論者各得展盡底裏相與協濟耳為二臣者其何以仰酬聖意臣嘗妄謂鄭清之有宰相之度而才不足喬行簡有宰相之才而力不

速合二長以共成事功其庶幾乎然臣竊有憂焉蓋自後世克己之學不明而執要權者皆不免私情之徇權合而為一則過於自用而同列不得以行其志權分而為二則終於相忌而小人因得以乘其危浚鼎並命間隙忽開蚌鷸相持卒墮檜手此分任之弊也權檜獨相虐焰薰灼忠臣義士飲氣吞聲此專任之弊也今天下可謂多事矣合衆人之智以為智兼衆人之勇以為勇猶懼不給顧可二三其德哉臣願陛下下臣此疏宣諭

二大臣以周召為法以浚鼎為戒毋使復有如檜者持刺虎之術以售其姦不勝宗社之幸生靈之幸

鳴復又奏曰臣比聞都城復有鬱攸之變七年之間災禍迭作陛下焦心勞思不遑寧處宰執負咎引慝不敢安居羣有司百執事惴惴奔走之餘精思熟慮求所以進言於陛下者不為不多矣臣濫分閫寄密邇輔藩當無事之時既不能貢曲突徙薪之謀於有事之日又不容施焦頭爛額之術事變叢脞人心憂危臣實懼焉臣不避狂愚

謹以三言為獻一曰願陛下脩實德以格天不睹不聞之際天心之鑒照也甚嚴無聲無臭之間人事之感通也甚易必夙夜畏威而後可以回天意必屋漏不愧而後可以永天命毋徒曰避殿減膳已足以示躬行之實此殆具文也二曰願陛下行實政以安民兩淮京襄胡為而墮於塗炭四蜀關隴胡為而斃於干戈兵端之妄開既有以致紛擾之禍必兵端之暫息然後可以收安靜之福毋徒曰發府庫百餘萬錢給倉廩十數萬斛已足以賑一時之急此殆

小惠也三曰願陛下求實才以輔政宰執侍從得人則朝廷治監司守令得人則郡國治將帥守禦得人則邊境治除授在朝廷各有以當其選則服後在天下斯有以稱其職毋徒曰奉璋戩戩我佩玉濟濟已足以盡一世之人物此殆觀美也所修者實德所行者實政所用者實才當今急務莫切於此信能行斯三者則轉禍為福易危為安有不難矣患難之來乃人主建功立業之地惟陛下加之意鳴復又奏曰臣猥以愚庸濫叨器使向者便殿引對兩

陳奏疏之外以違遠闕庭懷不自已嘗冒進狂言願陛下
下定大本執大權求實才行實政到郡未幾且復奏聞
然舉其綱猶未條其目提其要猶未布其詳也今陛下
不以臣為不肖召自藩閭俾與政機揆度時宜審觀事
勢方今急務無切乎此用敢申其說以獻何謂大本主
器出震明兩作離是也古者帝王即位必首建世子以
為宗廟社稷無窮之計世子者王之貳天下之本也世
子定而天下國家之本定矣然與子易與賢難與賢非

難擇其賢者之為難也嘗即其難者而思之必先於養而後可以擇必謹於擇而後可以與英宗年未齒薨即鞠養於禁中仁宗皇帝視如己子育而教之以全其氣質不待擇也高宗皇帝詔知南外宗正事令廣選宗子以進既而貓過而蹴者不足以任重拱立如故者遂足以付託此謹於擇也邇者御筆肆頒令宗司參酌彛典建置內學選育宗賢天下翕然傳誦謂陛下知以宗廟大計為慮矣今聞諸道路宗賢雖選而未決內學雖置

而未備夫與其育於外曷若教之於內與其咨於人曷若斷之於己優柔饜飫之際性習之所由成動容周旋之間德量之所由見陛下春秋鼎盛當有皇嗣誕生然與賢與子皆天也非人之所能為也陛下儻能承天意以從事力行其所已行必建內學必育宗賢視其所以觀其所由察其所安而徐為之決擇則人心有所屬天命有所歸而陛下之聖心亦泰然其有餘裕矣此重事也陛下已開其端臣敬以是為陛下賀何謂太權惟辟

作福惟辟作威是也昔之英君誼辟未有不自執其權而可以有為於世者然天下之大事物之衆豈一人之智力所能酬應哉言之在人行之在我其利害之所關繫特在乎斷與不斷耳執狐疑之心者來讒慝之口持不斷之意者開羣枉之門孝元優游不斷故政出多門而漢之業以衰光武赳赳雄斷故權綱總攬而漢之祚以復有天下者可以鑒矣陛下日親經幄閱天下之義理已多日御路朝更天下之事變已熟亦嘗究觀前古

理亂之原乎自古兆亂之端有四而弭亂之本有一強臣擅兵朋黨交扇外戚預政中常侍用事所以兆亂也操縱予奪一出於我慶賞刑威不移於人所以弭亂也重其任使戴吾之德收其權使畏吾之威則強臣無擅兵之患矣休休有容者任之而勿貳截截善諷者去之而勿疑則朋黨無交扇之患矣公議不以私情奪公器不以私恩授則外戚無預政之患矣腹心以之託君子法制以之繩小人則中常侍無用事之患矣陛下信能

行此使天下大權一歸於人主天下大政盡出於中書則紀綱修明法度峻整天下事尚安有不可為之理哉此要務也陛下當謹其微臣敢以是為陛下勸若夫人之才之賢否政事之得失係焉有是實才斯有是實政脉絡相通不容以二觀也陛下即位十有四年矣天下有望治之心而無平治之實則所以為陛下用者不能不負陛下也寶紹之始柄臣專國鉅天下之口而奪之氣故相與附和而一時之才病於諛端平以來朝廷更化

鼓天下之氣而使之伸故談辯風生而一時之才又傷
於激諛固非盛世事也激而不已豈國家之福哉臣曩
在臺端嘗慮及此故於請對之初首以致中和建皇極
之說進今雖數載而此風猶未靜也非特不靜而草茅
之士又風其焰而烈之此何異南北部互相譏揣三君
八俊八及之共相標榜其不成黨錮之禍者幾希阿諛
之久既變而為矯激矯激之窮又浸入於浮虛曰吾言
不售吾志不行但有去而已矣嗟夫同舟遇風胡越相

救生此王國去將安之曾謂少無宦情不預世事果可免排牆之禍乎欲潔其身而亂大倫學自孔氏君臣之義如之何其廢乎舜命九官同寅協恭不聞其以矯激爲事周公六職敬爾有官不見其以引遁爲高泰和在唐虞成周可爲萬世法也陛下誠能詢四岳闢四門如舜言焉必責之以底可績行焉必要之以成厥功考其幽明加以黜陟則實才不患其不著以八柄馭羣臣如周邦國都鄙各謹攸司月要日成各共乃職歲終而小廢

置三歲而大誅賞則實政不憂其不舉不然虛名者用而不察其所辦者何事空言者進而不計其所成者何績以此致治未見其能治也臣在會稽有議及時事者忽謂臣曰端平之不為元祐無恠也元祐之君子斂熙豐之紛更而務為安靜端平之君子厭嘉紹之萎靡而務為紛更三京之役取湟鄯之故智也元祐為之乎稅畝之事散青苗之餘習也元祐為之乎舉事有如熙豐而致平欲為元祐無恠乎端平之不元祐也此往事也

陛下既知其所以失則當求其得可也臣敢併以是為
陛下告大本定於內則宗社之勢以固大權執於上則
禍亂之原以消以天下之實才行天下之實政則吏稱
其職民安其業而若內若外之治皆可次第而舉矣傳
說之告高宗曰非知之艱行之惟艱惟陛下不以其艱
而力行之宗社幸甚天下幸甚

軍器監丞杜範入對言陛下親覽大政兩年於茲今不
惟未覩更新之效而或者乃有浸不如舊之憂夫致弊

必有原救弊必有本積三四十年的蠹習浸漬薰染日深日腐有不可勝救者其原不過私之一字耳陛下固宜懲其弊原使私意淨盡顧以天位之重而或藏其私憾天命有德而或濫於私予天討有罪而或制於私情左右近習之言或溺於私聽土木無益之工或侈於私費隆禮貌以尊賢而用之未盡溫辭色以納諫而行之惟艱此陛下之私有未去也和衷之美不著同列之意不孚紙尾押敕事不預知同堂決事莫相可否集議盈

庭而施行決於私見諸賢在列而密計定於私門此大臣之私有未去也君相之私容有未去則教條之頒徒為虛文近者名用名儒發明格物致知誠意正心之學有好議論者乃從而詆訾訕笑之陛下一惑其言即有厭棄儒學之意此正賢不肖進退之機天下安危所繫願以其講明見之施行

範為右丞相入覲帝親書開誠心布公道集衆思廣忠益賜之範又上五事曰正治本謂政事當常出於中書

毋使旁蹊得竊威福曰肅宮闈謂當嚴內外之限使宮
府一體曰擇人才謂當隨其所長用之而久於其職毋
徒守遷轉之常格曰惜名器謂如文臣貼職武臣閣衛
不當為徇私市恩之地曰節財用謂當自人主一身始
自宮掖始自貴近始考封樁國用出入之數而補窒其
罅漏求鹽筴楮幣變更之目而斟酌其利害仍乞早定
國本以繫人心

上命宰執各條當今利病與政事可行者範又上十二

事曰公用捨頭進退人才悉參以國人之論則乘罅抵
巇者無所投其間曰儲材能內而朝列則儲宰執於侍
從臺諫儲侍從臺諫於卿監郎官外而守帥則以江面
之通判為幕府郡守之儲以江面之郡守為帥閫之儲
他職皆然如是則臨時無乏才之憂曰嚴薦舉宜詔中
外之臣凡薦舉必明著職業功狀事實不許止為褒辭
朝廷籍記不如所舉並罰舉主仍詔侍從臺諫不許與
人覓舉曰懲賊貪自今有以賊罪案上即行下勘證果

有賊敗必繩以祖宗之法無實跡而監司妄以賊罪誣人者亦量行責罰臺諫風聞言及賊罪亦行下勘證曰專職任吏部不可兼給舍京尹不可兼戶吏經筵亦必專官曰久任使內而財賦獄訟銓選與其他煩劇之職必三年而後遷外而監司郡守亦必使之再任其不能者則亟行罷斥曰抑僥倖布告中外各務職業朝廷不以弊例而過恩宮庭不以私謁而廢法勲舊之家邸第之戚不以名器而輕假曰重閭寄曰選軍實曰招土豪曰

宜倣祖宗方田之制疏為溝洫縱橫經緯各相灌注以鑿溝之土積而為徑使不得並轡而馳結陣而前如曹瑋守陝西之制則戎馬之來所至皆有阻限而溝之內又可以耕屯勝於陸地多矣曰治邊理財實為當今急務有明於治邊善於理財者搜訪以聞

秘書少監袁甫上疏曰臣竊伏思念先臣某事寧考朝嘗進精神之說大要以為人主運動天下其妙在精神寧宗欣然嘉納臣今復掇拾遺論為陛下詳言之陛下

新更大化日與大臣論道經邦精神之運宜可以光宅
風動矣而中外多事蠹弊滋長因循歲月未臻厥成其
故何哉君臣之間聚精會神之意常少而事物之來敝
精勞神之患常多此正今日之大病也陛下每旦韓色
視朝大臣奏事之後或間以臺諫之論奏或繼以百官
之輪對而經筵早講已迫矣進膳之餘陛下復於宮中
省閱章奏而晚講又且迫矣則是一日之中焦焦焉疲
其精神不亦甚乎精太用則竭神太勞則敝此必然之

理也況天下之事有緩急有輕重於其緩且輕者姑徐徐焉應之則可以併其精神於急且重者而無失事之患今陛下既以聽政勸講窘於日力之不給而中書之務不問巨細內而庶政外而邊防叢委輻輳盡歸廟堂無一事之區處不關於念慮無一紙之申明不經於裁決雖曰機務總括之地勢則宜然亦恐執要御詳之道未必如是陛下與二三大臣有限之精神既已奪於泛泛之常程則夫急政大務所當靜觀默察者安得復有

精神以為之運用耶夫所謂急政大務者何也上而畏
天下而愛民舉至大至重之責萃於陛下之一身陛下
亦嘗思之乎迺月正元日風從乾來占為兵起越三日
月犯太白占為強侯作難天下民靡敝立春之朝條風
起西北占為暴霜殺物粟踴貴驚蟄後一夕雪降非時
占為迫近之象又七日太白與填星合占為疾為內兵
既而隕霜之異果在寒食之後則春日所占不虛矣陛
下覩茲變異惕然自反凡可以召和者無所不用其至

此則陛下所宜專用精神者也近者邳徐失守海亦旋
棄新復州郡勢皆瓦解外虞既急內備又單維揚半是
北人洞知我之表裏事勢如此真可寒心軍實隳於輕
進戍兵勦於屢衄枵然空虛何以應猝況所在軍情易
於激變殺官吏焚州縣如惠陽近事漸豈可長齊安隱
憂未容安枕而豫章近地幾致生變推其所以致此之
因皆由帥聞久虛素無鎮壓之勢兵備單弱易啓陵侮
之端此亦陛下所當倍加精神者也而臣竊窺今日之

勢君臣上下非不夙夜究心然大抵緩急重輕混而為一始欲俱急而終至於當急者亦緩始欲俱重而終至於當重者亦輕在彼既有所分則在此者必無所專是亦可以悟敝精勞神之失矣奈何因循苟且不能奮然改其舊而新是圖士大夫有憂國之心者徒能仰屋竊嘆而無敢精為陛下言之者雖言之而陛下亦未必能行之也孟軻曰堯舜之知而不徧物急先務也堯舜之仁不徧愛人急親賢也夫以堯舜大聖不以周徧為能

而惟以急先為貴若之何悠悠泛泛而欲治道之興起乎是故善運其精神則雖憂勤而決無勞敝之患不善運其精神則雖勞敝而反無憂勤之實光陰迅速歲不我與陛下勿恃春秋之鼎盛而輕用其精神也臣忠愛之心出於懇惻惟願陛下與二三大臣日夜聚精會神毋以薄物細故耗有限之力必使志慮專於大政規模急於遠圖天下之事綱舉目張而太平不難致矣惟陛下財幸

益王府教授吳昌裔上奏曰臣嘗讀儀禮始見于君執
摯傳曰摯者質已之誠致已之悃悞也故盟心以待對
積誠以告君在昔儒臣率謹茲禮臣雖晚陋愚鄙無所
肖似然於見君父之始何敢不潛思積慮輸漑悃悞求
所以忠陛下之職分乎臣聞天下之理有感必有應陰
陽之屈信而冬必有春日月之晦明而晝必有夜寒暑
之往來而雨必有暘盈天地間無一非感應之理也人
君中天地而立執感應之機一悟而反風一懼而銷旱

一言善而星曜順軌一氣清明而山川出雲其機曷如是速耶不寂未有能感不虛未有能應不誠未有能動者也動以天則物與無妄而皆誠動以人則朋從爾思而爲咎天人證應之舒疾顧人君所以感之者如何耳恭惟皇帝陛下天造神斷日濟聖功負荷神器襲四宗之緝熙至孝也親攬政機制八枋之予奪至剛也銳情經術究百聖之精微至明也以英睿不世之主乘改紀更化之時是宜已日乃享暮年而變風動不應惟上之

從然人情翫愒敝化未新乾象推移妖祲錯起月犯金
宿火入帝垣太白經天流星墮地風雷雨雹之變奉諱
惡於太史者無月不書而四方逆賊之事麗司馬之法
者又無日而不有也不視其形而察其景游聲嚙啗私
切惑之陛下試於蠖濩之居清閒之燕政事不干於思
慮嬖御不接於清明此時此際靜觀密察究所以然之
故無乃澄源正本之地天理有未純歟立政造事之間
天德有未健歟誠身謹獨之際天命有未敕歟圖事揆

物之所天工有未亮歟班朝表著所以治天職者未公歟軍伍府衛所以奉天討者未正歟天非昭昭之多也非蒼蒼之謂也此在陛下之心百官之志朝廷之政事三軍庶民之視聽而已臣請區別其目為陛下熟數之天地生物各無不足之理天理在人常有不盡之分蓋反身而誠則天理存感物而動則天理滅是以舜敕天叙之典禹叙天錫之彝湯綏帝降之衷無日而不與天對也天尊地卑而君臣定聖作明述而父子親兄弟既

翁而父母之心寧夫婦有別而內外之位正所以維持
宇宙經紀國家不大泯亂于民彝者用此道也陛下聖
心虛靜天理融明大本大經孰不精講然本末舛逆經
制搶攘君命犯主威奪逆節姦萌見聞而起倡聲臆決
皆有輕朝廷之心此豈可求之陛下之身外哉袁絲無
驕主之諫張敞無就第之書徐傳無暴罪之詔蓋經一
世而君臣之綱不明子仲無命蔡之封子安無列侯之
爵策隱無改卜之典蓋歷一紀而兄弟之倫不復永正

統者不顧私親禮也京師立廟未央設幄而本統之義不尊基王化者必本后妃詩也後庭數游教坊盛選而嬪嬙之御無節陛下毋謂執命之臣無關於王度因心之友不與於邦常並統二上無嫌於宗社之靈深宮閒居不顯於邦家之化心術一形於此而證兆著見於彼捷於影響甚可畏也陛下儻一旦赫然震怒穆然深思追一竦之謚以誅姦諛錄涪陵之孤以厚倫理以奉秀園之典而抑顧復之恩以戒張媛之言而防私諛之謁

則大綱正而等威尊小宗法而本統重鵠原有歸而嗣
息以蕃魚貫順序而壽命以固無非祈天永命垂裕後
昆之本也子盜父兵之語人所難言蒙犯霧露之諫非
所宜道然人臣一言而主聽隨悟蓋觸其天理油然而
機耳今言及權臣者不過欲明綱常而陛下謂之捃摭
言及濟嗣者不過欲篤恩紀而陛下謂之輕議言及王
邸戚藩者不過欲辨等物而陛下必為之愀然不樂見
于色辭遂令天地之經隱於人心者舉朝相告以為世

之大戒豈所以立人紀而範來世乎此臣輒議陛下天
理之未純也一日而一周天者天行之運一息而無非
天者人君之德天德不運則化育之功閉君德不强則
物欲之私行是以帝德之廣運湯德之日日新文德之
純亦不已皆與天爲一也威福玉食則曰辟賞慶刑威
則曰君禮樂征伐之所自出曰天子典禮命討之所以
行曰天王凡經理萬機宰制羣動納民庶于軌物者此
天德也陛下夙興視朝大昕聽政位于天德罔不清明

然勵精之志雖勤致理之效逾邈更化志操衰於始初
言來而多疑事至而少決盱豫有悔已開羣邪窺伺之
端此豈可不求其故也蓋繫累於物欲之多則天德不
健牽制於文義之細則天德不健黯闇於私昵之請求
則天德不健回互於舊恩之除授則天德不健壅閼聽
候於暫御之人則天德不健猜貳仁賢於讒慝之口則
天德不健陛下盍不思左右便辟非伐德之斧乎媼婭
媼仕非累德之疾乎保阿女巫非溺德之淵乎壬人讒

說非損德之弇乎陛下儻體乾之健德而閑陰邪用洪
範之剛德而克偏諛行中庸之勇德而經綸天下之大
經使政事必歸於中書官府必統于冢宰紀綱必一于
臺省選舉必本於天官則以之式我王度豈不清正我
朝綱豈不肅用之於私蹊邪徃豈不杜用之於師律軍
政豈不嚴此則天德王者之政非特如後世之勵精綜
核而已司馬光歷事四朝而所言不出仁明武之三德
范祖禹進帝學一書而其要不過謂法仁祖則可至天

德祖宗之所以爲學先正之所以告君天德之外無他法也或者謂陛下有帝堯之神而僅循孝元優游不斷之迹有湯文之勇而微近文宗不能堅決之風有可以法仁祖至天德之資而天運不息未能盡如四十二年之治其何以強庶政而作新民乎此臣輒議陛下天德之未健也勅天之命惟時惟幾時者事之宜幾者動之微也蓋天命不已流行於起居日用之間時時整勅則爲吉爲永年爲無疆惟休一有不勅則爲凶爲不其延

為早隆厥命於一日二日之幾常有明徵定保之戒此
帝王君臣所共兢業也我國家積德深厚受命靈長陛
下昭事小心罔不祗肅然天命不易天位惟艱灾祥之
降靡常休恤之幾可畏必罔游于逸罔淫于樂而後可
以勅天命必無敢戲豫無敢馳驅而後可以勅天命必
其疾敬德其德之用而後可以勅天命必知小人之依
知稼穡之艱難而後可以勅天命湏于酒則天命不又
班伯號呼之戒不可以不思愒于色則天命多辟南威

靡曼之好不可以不遠土木之崇非所以謹天戒大寶
瓊臺之箴不可不日陳於前愆兵之出非所以應天道
丹書造矛之銘不可不日省諸已夷夏大勢隍杞而未
定也邊方遠民離散而未集也塞外吏士反復而難養
也寇賊姦宄鴟義而難安也天下愚夫愚婦之情怨詈
而難保也臣願陛下亟於此時上下相勅用司馬光罷
燕飲之戒以保太和從王素出女口之諫以壽國脉行
王曾玉清昭應之䟽以息民力聽富弼二十年不道用

兵之語以阜安宇內深惟幾康克自抑畏日謹一日以
迂續乃命于天此今日最急務也若臨朝接下所奏皆
常程文書宮中宴處所問多閭閻細事而安危界分利
害機括所以關係天運者則不致深長之思豈所以勅
天命乎無曠庶官天工人其代之治人者官而代天者
相也道揆職任當體造物為心撫五辰順四時而後可
以代天一物失所則非天也鎮四夷附百姓而後可以
代天一夫不獲則非天也統百官均四海而後可以代

天一賢不得其職則非天也位育和同之妙不過彌綸
輔贊之間代天工者蓋亦盡天分而已陛下上稽天運
下揆人情祇遵先猶並命二相聖斷先定人望允孚謂
宜朝紳動色相慶海寓延頸升平而廷揚以來將閱三
月未見勤彊夙夜以行所欲為況今天下弊積事極外
有窺邊之虎兇內有起陸之龍虵四方有敗日至廟堂
蕭牆之憂近在旦夕氣象凜凜如此此豈亢章引去所
能解紓耶此豈杜門謁告所能鎮定耶此豈避權遠謗

所能茹納耶唐朝宰相於政事堂更旬秉筆為員數猥多也國朝宰輔遇機速事輪日當筆為軍務擁併也更禮委延賞刑罰委渾軍旅糧儲委泌德宗之責成至矣而言復中悔張浚可專治軍旅胡松年專治戰艦財用可專委一大臣我高宗之責任專矣而事不果行蓋宰相非他官比也非可以一職名也非可下行有司之事也天下機務當共平章天下人才當共進退朝廷事宜當共處分邊郡吏瑣當共科條同寅協恭和衷哉是出於衷而後為和也

據亦同耳焉得和是心乎和者不必同也昔臣琦等論
事如爭及至下殿不失和氣今於殿上唯唯可可而退
朝以後人各有心其不與先正之和異乎臣公著等日
聚都堂率與同列各盡所見今雖都堂會聚如昔而人
懷異見不能自盡其不與先正之和異乎該政事則問
集賢該典故文學則問東西廳必事事公共商傳而後
謂之和也欲知選事則問吏部欲知財用則問戶部必
人人博加諏訪而後謂之和也設或面從而心違陽與

而陰異豈所謂忠臣不和之節乎臣願陛下申勅二相
永肩一心開誠布公竭節勵善曰方今何事可憂何人
可任何利可興何弊可革何者為急務何者為危機愛
惜分陰力行好事以杜韓之公道自任以馬呂之正學
自期以梁賈之務崇私交不篤義訓為戒如此何患乎
經綸事業之專美於昔也摯與大防本同心耳而吏額
增損乃啓黨論之爭浚鼎情分如兄弟也而賓客往來
遂造讒說之間一隙不謹而小人乘之邇臣不和庶政

皆情豈所以贊元工乎一世人才所與治天職也陛下
更化以來收召衆正白首耆艾之士骨鯁碩大之儒厄
於柄臣久鬱民望者悉皆錄用有位于朝可謂治世之
良瑞邦家之景光也然賢者充庭而治不加昔與亂同
道往往過之是豈君子果無才耶善人果不能辦事耶
儒術果迂且腐無益人之國耶不蔽帝臣者乃所以事
帝弗共天位者非所以尊賢蓋知賢而不用用之而不
盡則爲弗敬厥職弗克若天矣尊事黃耆圖任舊人尚

猶詢茲黃髮此詩書之美事遠耆德播棄黎老咈其耆
長舊有位人此商周之衰形陛下召彼故老凡耆壽俊
罔不在厥服矣然典刑四朝經理全蜀者猶有未就予
忌之嘆十年躬耕一介不取者猶有亦不我力之疑彼
其陳謨抗論不遜於諸儒也服采錯事不衰於晚學也
顧乃謂哲為愚謂耄為誕而佚之閒廩何耶其惟吉士
其惟克用常人惟成德之彥又我受民此立政之根本
勿以愉人無以利口無以巧言令色便辟側媚此周官

之法度陛下登崇俊良凡庶常吉士咸布在臺省矣然
先事衡慮力諫用兵者常有曷予還歸之興竭節盡言
白發姦墨者日有亦惟斯戾之憂彼其橫身以抗羣小
非爲私也出力以爲國家非要譽也顧乃謂才勝德謂
利捨義而潔其去志何耶公卿大夫當用有經術明大
誼者而唯諾供給奉行文書之士猶參錯於其間則得
無疏痺雜糅之嫌法從近臣豈無陳善道廣聞聽者而
精銳銷與莫敢盡言之人亦載尸於其列則寧免珉瑜

混淆之病不懈于位民之攸墜職當思其居也自處官
不親所職而怠事之弊生靖共爾位正直是與官必守
其道也自行事互觀顏面而徇情之弊生魚潛在淵或
在于渚謂下位不援于上也自浮競驅馳計資商利而
嗜進之弊生鳳凰鳴矣于彼高岡謂直聲有聞于時也
自上下選懷容頭過身而循默之弊生陛下之所以治
天職者三事大夫也四輔疑丞也臺省長官與百執事
也今上無樂與之誠下無首公之節良實者怨乎不任

盡忠者憂乎見疑以身任事者懼於眷衰以言犯顏者嫌於厭薄周行之彥未能一一極其妙選而欲以補綻缺壞支撐傾邪求變化於朞月之間不亦難乎臣願陛下謹好惡之偏戒邪正之雜保守初意純任諸賢勿使在外失職之徒日夜窺伺規求復用以動搖朝廷則天職公而人心籲矣賞罰二枋所以正天討也陛下奮發明斷總攬權綱一紙而斥二凶一疏而逐二帥凡懷譖黷貨之徒次第屏斥于外可謂得一怒之正明五刑之

公也然威令雖振而陟罰無章嫗柔豪強漸用頽弛邊臣不稟於朝筭軍吏不尊於王官衙校偏裨不憚於主帥此豈一日之故耶將明威以臨有罪謂之天罰奉王命以伐不仁謂之天吏蓋命討皆以天論一置私意于其間則是我之賞罰非天之賞罰矣籍賢家財收蕪財貨斥賣元載家產藩貨之家必錄此天也今奪民之產者輒貸倍軍之賦者輒略盜庫之金而有案括京之錫而厚藏者皆置不問乃摘其近者一人姑懲之適所以

警餘黨而為之計此天討之不正一也戮馬謖廢商浩
繫劉彥之債軍之將必罰此天也今棄師於汴洛者不
斥殲民於邳徐者不誅救宿而委濟糧攻唐而棄鎧仗
者悉皆廢法不惟不明春秋責帥之誼而其徒之輕儇
屢敗者亦貸之此天討之不正二也神策恃恩驕橫君
子謂德宗之失刑禁軍遮馬告寒英主歎莊宗之無法
軍法之行當自近始天也今輦轂之下咫尺天威折箠
嘯呼比屋沟懼嗔目汰軍則為之住揀藉口罷教則為

之賜緡部輅嚴緊者以召怨而罷歸將領縱容者反以有勞等第行賞此天討之不正三也絳卒以無糧叛子儀遂正行營之誅淮兵以防秋潰李泌运行軍門之戮蠱賊內訌法所不赦天也今郡國之兵動踰階級廣寇以逋而佚罰建卒以潰而稽誅丹徒水軍遣帳兵而始平高沙戍卒降黃榜而後下不惟瘡殘灰燼未息民畧而戎首厲階尚屈邦憲此天討之不正四也夫外寇未平四支之病內政不理心腹之憂宿衛喧謗不治姦雄

見而生心朝廷事柄不一藩方歸而益橫天下之變紛
擾不齊亦在為國者謹其政刑而已今政令垢翫文法
羈縻罪以隱匿而不彰功以嫌疑而不賞天下大姦猶
有漏網匹夫小人猶敢爭衡為政如此亂何由而已乎
臣謂賊吏之不戢非公也得一李絳則人爭輸家財以
代賦矣邊臣之不戒非斷也得一宋璟則人不敢求邊
功以希賞矣王駕鶴典禁衛人懼為亂而轉移于坐語
之間則一祐甫為之盧從史擅鎮兵或疑其變而縛致

於從容之頃則一裴垪為之朝廷有道宰相明哲天下
事何有不可為耶臣願陛下謹審政理宣明典章本常
理之大公絕姑息之私意毋使朝廷政令一有蹉跌而
宿姦新蠹不得以遺育易種於明時則天討公而人心
服矣臣之所言六事非敢支離其辭也上天之載流行
者曰命秩序者曰理得於身者曰德授於人者曰工措
諸事業者曰職用諸刑罰者曰討目雖有六而本則一
也一則公二則私一則天理二則人欲一則陽明勝而

君子用二則陰濁行而小人長易曰天下之動貞夫一書
曰善無常主協于克一中庸曰天下之大本達道所以
行之者一者何天是也天者何誠是也陛下日御經
帷緝熙聖學清明在上湛濁在下不知嘗存養此一
乎明師在前勸講在後不知亦講貫此一乎臣每惜
陛下有天地貞一之心而攻取於血氣物欲之私有聖
人精一之學而蒙雜於諸儒曼衍之說不惟後宮之左
右嬖御有以亂其聰明而細穽之間毀譽是非亦得以

撓其純一是以天理乍明而還晦聖斷方銳而復衰行一善也而猶有小不忍牽於其中用一賢也而或以小有才乘於其後端良之士雖好而未能壞散險詖之聚安靜之說雖入而未能絕去喜功之根一日之中二者交戰此豈陛下之本心乎輔拂之任未有專官誦說之時不過數刻其於學之精蘊未皇專一講明而心之危微不免攻之者衆衆說淆亂而初意轉移此正程頤所謂講讀五人率兼他職乃無一員專職輔導拳拳於元

祐者盖有味乎其言也陛下儻能采用臣頤之說禮命脩博之儒使之日親便坐專以正君為職或賜之內直相與講論經理薰陶之習久而德性融持養之志一而治功起則學焉而為孔孟德焉而為堯舜多歷年焉而為商為周無非同此一理如臣所言六事亦在其中矣始晉罔孚浚常求深臣則有罪惟陛下財幸

昌裔為監察御史又奏曰臣聞壽天下之脉者在國論閑人心之邪者在朝綱國論之不立脉病隨之矣朝綱

之不正邪氣乘之矣天道陰陽之界限人才消長之樞機世運治忽之萌象昔之君子每於此乎覘焉臣仰惟皇帝陛下臨御海寓幾一周星改紀政弦亦再閱歲以斥遠壞爛之天下而希端平恢拓之治功勵精雖勤責效逾邈作興不逮於初意運掉若乖於素期勦敵鷗張軍慙蝟起環視世務事事不牢猶幸拔擢風憲之官開廣忠直之路御筆徑下而外庭不知國家真元存此一髮或者以是知隆平之運尚可冀也臣一介疎遠廉靖

自將忽蒙誤恩獲玷分察若昔先正居是職者曰此爲
何官曰此官不比閒慢差遣故有入臺之次日而論社
稷之大計供職之三日而言治亂之本原臣雖妄庸其
於受命之始敢不空臆盡言以荅陛下之親擢哉臣竊
惟國朝家法治體寬厚而憲度浚明外戚避親近之嫌
不敢與政閹寺供洒掃之職不敢竊權近習畏清議之
口不敢輒奸國事軍國大務則委二三大臣公議之時
政缺失則置五六臺諫密察之是以事歸中書責重言


路政令詳審朝廷尊嚴定公是而銷姦萌者此也景德
之議論在戰慶歷之議論在和治平之議論在於鎮定
羣疑元祐之議論在於扶植衆正議革弊者不牽於姑
息議變法者不狃於勸令用君子則不參之以小人主
正論則不雜之以邪說上自人主下至大臣先事而謀
據義而守此議論之所以純一不二也今之國論果何
所擇乎和戰二議之衡決邪正兩途之并容議一楮幣
也而乍收乍放之不齊議一督府也而或罷或行之不

一令出而還反論定而數移有繫隨之牽累而無介豫之堅決無恠乎議論愈多而事愈不辦哉歐陽脩以專脅而論夷簡蔡襄以懷安而論晏殊唐介以燈籠錦而論彥博王陶以不押班而論韓琦韓絳以事寢不下而論富弼劉安世以除授多其親舊而論公著大防純仁事苟有闕雖公衮之賢有所不避或以濮園之議而劾執政或以袖中之文而彈新參或率同列以言升之之交結或連九章以議方平之除拜或以廢格詔旨罪吳奎

或以不協物望排宗愈人苟有過雖丞弼之賢有所不屈臺諫明眸以言之人主虛心以聽之大臣為法而受之此國之紀綱所以憑藉而不替也今之朝綱果無所撓乎言及親故則為之留中言及私昵則謂之訖了事有窒礙則節帖而付出情有嫌疑則調停而寢行今日而遷一人曰存近臣之體明日而又遷一人曰為遠臣之地屈風憲之精采而徇人情之去留將恐士氣銷喪下情壅滯非所以糾正官邪而扶助國脉也雖然國論

者非一人之私也天下之公是也朝綱者非臺臣之利也天下之公法也世之有容德者常銳於慷慨願治之初必厭於玩習已安之後初則開導而易入久則勉強而難平耳目之官遂至孤立甚可畏也臣願陛下以公論責大臣而無爽其更化之初志以公法責臺諫而無替其導諫之初心使君子有所恃而安小有所畏而懾主本彊而客邪不入脉理密而外寇潜消則三院紀綱之地自今皆微臣砥礪節行之日也之綱之紀惟陛

下謹守而力行之謹錄奏聞伏候勅旨



歷代名臣奏議卷六十一